



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir_yimym

tir yimym **TAPAK 8**

Russia-i Ukraine nung tang tesashiba amaker

Salima lenisüba nung India tetsür team Asia Cup asayatsü



VOL. XXII ISSUE NO. 308 (ADOK 308) DIMAPUR ROGONÜ (FRIDAY) LUROI (AUGUST) 22, 2025 ₹ 5.00

DAB nung Nagaland aser Assam külemi mera agitsü

Dimapur, Luroi/August 21 (TYO): Nagaland Chief Secretary indang office ajanga August 21, 2025 nü sangdong ka agütsüba nung, Nagaland aser Assam sorkar lungjemer Disputed Area Belt (DAB) nungi illegal immigrants tem mintoktsü asoshi joint evction drive ka agiogo, ta ashi.

Iba sülen Assam-i yangji süngdong-lidong atemba mapa inyakba ajanga arütsülen

mangatetep adok. Iba mangatetep bentettsü mechi Nagaland aser Assam Chief Minister senden ka mena tang nungi tenzüka DAB nung süngdong-lidong atemba dena inyaksangshi ajak state ana külemi inyaksü mulungtepogo, ta sangdong ajanga ashi.

Külemi iba telemtetba agiba ajanga sorkar anaprongi arütsülen sunepa alitsü aser amalitep akatsü tangatetba nung inyakba sayur.

MORTH-i 2024-25 mapang Nagaland nung project 4 agizük

New Delhi, Luroi/August 21 (Agencies): Ministry of Road Transport and Highways (MoRTH) ajanga Nagaland nung National Highways tajungba kumdaktsütsü aser yanglutsü asoshi 2024-25 mapang project pezü agizük, koba sen 123 crore jenjang lenmang tasazük 20 liasü, ta Union Minister of Road Transport and Highways, Nitin Gadkari-i Brehostibarnü Lok Sabha nung ashi.

Tesüiba küm pezü tsüngta Nagaland asoshi lenmang terenlok, yanglutsü mesüra tajungba kuma yanglutsü atema sen 2,185 crore jenjang projects 12 agizük, aser itemji ajanga lenmang tasazük kilometer 214 awajem.

National Highways (NHs) yangluba aser anepaluba ya Ministry of Road Transport and Highways ajanga inyaker aser iba maparen ya tanen makai inyaker, ta ashi.

Traffic density, lenmang tesendaktep nüngdakba, lenmang indang jenjang aser PM Gati Shakti National Master Plan (NMP) den lirumedema inyaker.

Minister ajanga north-eastern states indang data agütsüba nung, Assam nung National Highway project ti agizük, koba sen 6,382 indoka lenmang tasazük kilometer 223 yanglu.

Manipur nung project asem agizüka sen 1,356 crore indoka lenmang tasazük 140 kilometre yanglu. Meghalaya nung sen 590 crore jenjang kilometer 23 awajema project ana agizük, Mizoram nung sen crore tenet atema project ka agizük aser Sikkim nung kilometer pongu project sen 161 crore jenjang agizük.

Data nung 2024-25 atema Arunachal Pradesh aser Tripura atema project kata agizükba shia mali.

ICAR-KVK Wokha nem Best KVK in NER sempet agütsü



Dimapur, Luroi/August 21 (TYO): ICAR-Krishi Vigyan Kendra (KVK), Wokha nem North Eastern Region nung Best KVK nüngja agütsüogo. Nominations 200 dak tema nungi tatishitsü tajung agüja aser temelenshi tulu bener aruba nung shilem agiba asoshi tenüngsang agüja iba sempet ya ICAR-NRCB ajanga

agütsür.

Iba sempet ya August 21, 2025 nü 32nd Foundation Day and Kisan Mela sentong Conference Hall, ICAR-NRCB, Tiruchirappalli nung alidang agütsü.

Iba sentong nung Dr. Tusar Kanti Behera, Director, ICAR-IIHR, Bengaluru tesemdanger tongti ama dena liasü.

Pimla nung nisung tepsetba mechi longkak ait tenzüker anogo 3 jungogo

Dimapur, Luroi/August 21 (TYO): Zeliangrong Youth Organisation Nagaland (ZYON), Zeliangrong Students' Union Nagaland (ZSUN), aser Zeliangrong Mipui Organisation (ZMO) ajanga Peren district nung anogo telatet makai phase tanabuba longkak ait tenzüker Brehostibarnü agi anogo asemnü buba jungogo, aser sorkar indang offices tem melapokteti aser National Highway-129 (A) mokdanga lir.

Deputy Commissioner, Peren ajanga iba ken o jembitsü atema senden ka jatepaka jaokba CSOs kata shilem magi, anungji Pimla nung nisung tepsetba asoshi mera tejangja magi tashi sorkar den amalitep makatsü akang-akanga nokdakba tali jangjatsür.

April 7, 2025 nü Mhaikam aser Pimla village tsüngta tetsür tasü mang ka nungutetba nung state sorkar aser ozü ng

amshiba agency temi ochi obendang magütsütetba yong longkak ya aiter ta parnoki ashir.

Sorkar den jembishinü masü dang iba ken o nung aibelener tenü ng sangdongtsüla aser forensic report ya sayatsüla, ta longkak aiter tei akhanger.

Dimapur nung August 14 nü osangbener den jembidang ashiba ama telok asem yagi sorkar meyong gari aser interstate lenmang tem nokdanga sorkar indang offices tem shibangja lir.

Tang tashinung gari 26 pua lir aser item rongnung sorkar tenü ng nung zülüoka aliba gari ana aser tanü ngba garitem ya NH-129 (A) nung senzüba transport carriers tem lir, ta ZYON tir R John Zeliang-i ashi.

Kasa mapang State Commissioner ajanga August 20 nü Deputy Commissioner,

Peren nem totuyuba ka agütsüba nung Pimla ken o nung tai tonglokja alir nem bail agüja aliba Principal Sessions Judge, Dimapur ajanga thitsüogo, ta metetdaksü.

Central Forensic Science Laboratory (CFSL), Kamrup, Assam nung forensic examinations ya tekeraba nung agidaktsütsü asoshi Commissioner of Police, Dimapur ajanga Director General of Police, Nagaland dangia temepishiba ka zülüogo, ta ashi.

Anungji Commissioner-i DC dang CSOs nem item inyakyim indang angatetdaksütsü aser longkak aitba anenang ta ajungshitsü totuyuba agütsü.

Yamaji teimla tajung sayuaka CSOs tem senden nung shilem magitsü temulungtetba nung akang-akanga nokdaka lir aser maneni mokdanger.

ATI nung ketdangsürtemi sorkar inyakyim ajungtsü shisa lemsatet

Dimapur, Luroi/August 21 (TYO): Administrative Training Institute (ATI) Kohima nung Institute of Secretariat Training and Management, DoPT, Government of India, New Delhi nungi Faculty tem den Nagaland Civil Service officers toku aser Nagaland Secretariat Service officers 18 den "Office Procedure & Management" indang training agia liasü.

Iba training nung shisalen sayur ya Jitender Bhatti, Deputy Director, ISTM liasü aser training ya August 19, 2025 nü tenzü k aser August 21, 2025 nü tembang.

August 21 nü sensaksemba sentong ka alidang ATI indang

Director General (DG), V. Shashank Shekhar, IAS ajanga shilem agirtem academic background ajungba den state nung tematiba tatidang, NPSC ajanga aruba atema pelaba lemsatetba liasü.

DG-i parnok dang iba training nung anguba shisatsü aser tajangshibatem amshitsü aser arok nüburtem asoshi inyaksü ayongzüka liasü.

Tebilemtsü bendenba yabo ajaki inyakttetsü, saka tangatetep bener arutsü ya tongtipang lir, ta Director General-i ashi.

Sensaksemba mapang officer trainees temi tebilemba lemsatetba liasü aser kari tanur aliba administrative officers atema

crèche facility (daycare) amenoktsü lenmangtem, grassroot administrative structure tashi itshitsü, administration aser sendaktepa aliba departments balala tsüngta tesendaktep tali tashi itshitsü nüngdakba, sorkar ketdangsüba nung ochishia aser tajungtiba nung mapa jeta inyaksü asoshi internet-based technology amshitsüba indanga lemsatetba liasü.

Iba sensaksemba sentong nungya Er. N. Moa Longkumer, Joint Director; Imlibenla Jamir, Deputy Director aser iba training indang course coordinator Kaholi Sema, Joint Director nungertem dena liasü.

Francis Kikon kübok GPRN/NNC (Apex Body) loktepogo

Dimapur, Luroi/August 21 (TYO): GPRN/NNC (Apex Body) indang council of Kiloners, army wings aser secretary tem ajungben senden ka Bodhbarnü mena Francis Kikon lenisüba kübok chichiba GPRN/NNC (AB) den ajak lokteptsü aser SS Pongkhu-i aniba GPRN/NNC (AB) shibangtsü pangjema liasü.

GPRN/NNB (AB) sangdong ka ajanga ashiba agi, mapa shidak meinyakba, ochimashi mapa inyakba aser tapi agi pei mulungba mapa inyakba mechi tir Pongkhu Yimkhung aser Alo Yimkhung, acting army chief mapa nungi anentsütsü renem.

Yangji senden mamen mesüra

council of kiloners aser tatars den shisa magitepi general secretary shimba, dictator yimya nung sorkar aniba aser linük asoshi inyaksü melen pa jurula tejangraba mezü ng südaktsür inyakba dena lir.

Yezhabo Article 17, Clause 21, 26 aser 30 nung aibelenba ajanga mapa nungi anentsütsü telemtetba ya agi ta ashi. Senden nungya Pongkhu nem GPRN/NNC (AB) tenü ng mamshidaktsütsü aser iba telemtetba sülen manidakra temerenshi tulu agütsütsü, ta senden nung pangjem.

Sorkar mesüra private establishments nungi GPRN/NNC (AB) tenü ng nung

Pongkhu-i senotsü teyari memeshitsüla ta parnoki ashi.

Kitoho H Zhimomi, home kilonser; Loketo H Zhimomi, chief secretary; Akito Sumi, deputy Kilonser; Kihovi Awomi, tatar; Mughaka Zhimo; Amen Walling, deputy kilonser; Jakugha Ayemi, leacy; Kido Swu, kilonser; Ikuto, KUT chairman; Zaki Zhimo, secretary; Inato Awomi, town commander; Imti Ao, kilonser; Yanger, deputy kilonser; Temsu, secretary; Roko Angami, kilonser; Limha Lotha, tatar aser David Sangtam, kilonser nungertem den zü ngsem 37 chichiba GPRN/NNC (AB) nung loktepogo, ta sangdong ajangasa ashi.

IRCS Mokokchung-i Chami yimdak Nahum Hostel semdanga tanurtem yari



IRCS Mokokchung District-i Chami yimdak Nahum Hostel semdangba mapang yangji alir tanurtem den tangokba noksa nung angur. Mokokchung, 21st August, 2025

Mokokchung, 21 Aug (TYO):

Indian Red Cross Society (IRCS), Mokokchung District-i ayongzüka Chami yimdak aliba Nahum Hostel semdanga yangji aliba tanurtem den temeim mapa inyaka liasü. Tanur ajak senteper parnok 19 den teyari balala lemsatep.

IRCS Mokokchung-i hostel tanurtem nem mozü, jang, ak shi aser amtsüktem lema agütsü. Iba teyari ya tilaka dang asütsü, aji süaka, koda masür atemabo ibaji tajangzük akaba tatishitsü mapa ka asütsüa akok, ta IRCS Mokokchung ketdangsürtemi metetdaksü. Parnokisa tarutsü

nunga iba ama teyari mapa ano maneni inyaksü tenangzüka agia liasü.

Iba sentong nung IRCS Mokokchung, General Secretary, Dr. S.S. Akaba Longchar-i anir Mokokchung Dy. CMO, Dr. Takosunep aser IRCS züngsem parnok 5-i shilem agia liasü.

Mokokchung nung GST training agi



Dimapur, Luroi/August 21 (TYO):

Goods and Services Tax (GST) dak sendakba nung Ao Temulung Kilem, Alongmen Ward, Mokokchung nung August 21 nü training sentong ka agiogo. Iba training sentong ya Department of State Taxes, Nagaland-i ayongzüka agia liasü.

Training ya Drawing and Disbursing Officers (DDOs), züngoksema aliba shishilembartem aser tanga tongtibang stakeholder tem GST provisions, compliance requirements aser tawa update asubatem indang tangazükba agütsütsü nükjiong nung ayongzüka agiogo.

Sentong nung State Taxes

Asst Commissioner Yanrenthung Yanthan-i, Tax Deduction at Source (TDS), DDOs atema returns registration aser filing, payment, GST refund aser aibelentem densema GST indang tongtibang temetetsütem metetdakja liasü. IT Cell nungi Biju Sharma aser Zeko Mero nati TDS registration aser returns filing dak sendakba nung practical demo ka agütsü.

Kasa mapang nung Commercial State Taxes Officer Roselinda Longchar-i, GST kübok registered dealer tem atema registration, returns filing aser Input Tax Credit (ITC) koda tongtibang iba indang metetdakja liasü.

Training nung DDOs, local lenirtem, business representatives aser tanga stakeholder temi shilem agi aser sensaksem asüba mapang parnoki GST dak sendakba nung ken o mangatetbatem asüngdanga jangjashia liasü.

Saru inyakyim tashi itshiba nung ajaki khuret angatetsü aser state nung GST inyakyim kecha tetsüdahtsü makai benoka inyaksü ayongzüker iba training tembanga liasü.

Training sentong ya Commercial State Taxes Office Vikavi Z Assumi lenisüba nung agi aser Deputy Commissioner of State Taxes Mokokchung I Mughato Aye-i lokti pela agizükba o jembia liasü.

DIPR ajanga metetdaksür

Dimapur, Luroi/August 21 (TYO): Directorate of Information & Public Relations-i sangdong ka ajanga, September 2 nü nungi tenzüka terbezüba Nagaland Legislative Assembly, Session tenetbuba idang osang

agitsü aliba osangbenertem dang iprnagaland@gmail.com ajanga August 29 nü tashi nung pei tenüng, Designation, Organisation aser Vehicle Registration Number (Car Pass atema) benoktsü metetdaksüogo.

WHL & OSC nung inyaktertem training agiogo

Dimapur, Luroi/August 21 (TYO):

181-Women Helpline Nagaland aser Sakhi-One Stop Centres nung inyaktertem atema anogo ana in person training ayongzüka agiogo.

Iba training ya Mission Shakti Nagaland, Savitribai Phule National Institute of Women and Child Development (SPNIWCD), Regional Centre, Guwahati, National Institute of Mental Health & Neurosciences (NIMHANS), Bangalore, aser Centre for Development of Advanced Computing (C-DAC) nunger longjemer August 19 aser 20 nü Mission Shakti Office, Kohima nung agiogo.

Training nung shisalen sayurji SPNIWCD nungi Dr. Swapan Shaw, NIMHANS nungi Dr. Chethana Kishore, Afreenbanu A. Khadirnavar, aser Rugozevou Khate aser C-DAC nungi Krishnendra Kumar Barooah nunger liasü.

Training ya gender-based violence agi kongshir aliba tetsürtem nem psychosocial teyari agütsütsü atema Mission Shakti centres ana nung inyaktertem nem tangazükba tajungba agütsütsü aser centre tem kecha tetsüdahtsü makai inyaksangshitsü asoshi technical training agütsütsü nükjiong nung ayongzüka agiogo.

Sentong nung lokti pela agizükba o jembiba mapang Director, Social Welfare aser Member Secretary, Mission Shakti Tosheli Zhimomi-i, WHL & OSC nung inyaktertem nem tangazükba tajung agütsüba atema shisalen sayurtem dang kanga pelaba lemsatep. Laisa, training nung shilem agirtem dang takok tashi angazüktsü ajungshia liasü.

Sentong nungsa Secretary, Social Welfare Department & Mission Director, Mission Shakti Bodeno S. Colo-i, OSC

& WHL nung inyaktertemi timtem nung aliba tetsürtem nem tanen makai teyari agütsüba atema parnok nem tenütsang agütsü. Laisa, 2016 küm June ita nungi tenzüka 2025 küm March ita tashi nung WHL-i calls 3299 agizükba teyari agütsüogo aser One Stop Centre temi gender-based violence dak sendakba nung ken o 1529 bentettsüogo, ta ashi.

1 8 1 - W O M E N HELPLINE(WHL) ya teyari nüngdaka aliba tetsürtem atema 24 hours toll-free telecom services ka lir. Iba yagi police/fire/ambulance services amala emergency services ajak atema 112-Emergency Response Support System (ERSS) den sendakteptsür aser non-emergency ken o tem atema One Stop Centre tem den sendakteptsür. WHL-isa, tetsür atema amenoktsür aliba sorkar schemes/programmes/services/legal support aser guidance dak sendakba nung osang agütsür.

Kasa mapang nung SAKHI ONE STOP CENTRES yagi lendong nung aliba tetsürtem nem teyari agütsür. Iba centre yagi medical, legal, temporary shelter, police assistance, psychological aser counseling support amala teyari balala agütsür.

181-WHL aser 1098-Child Helpline (CHL) na sendaktepa lir aser Women & Child Development (WCD) Control Room densema lir. 181-WHL ya 112- Emergency Response Support Services (ERSS) aser Sakhi One Stop Centres den sendaktepa lir.

Tetsürtem shirnok timtem nung ali parnoki toll-free number 181, mesüra 9485239098 dangi call sütettsü mesüra OSCs den tongteprateptetsü, koba state kübok district 11 nung amenoka lir.

Teintet rogotem angati temang reprangba sentong ayongzüka agi



Dimapur, Luroi/August 21 (TYO):

World Senior Citizen Day nungtem nung teintet rogotem (60 years & above) asoshi anagati temang reprangba sentong ka Ao Senso Telongjem Chumoukedima (ASTC) aser Chumoukedima Ao Baptist Arogo (CABA) na longjemer ayongzüka agiogo.

Iba sentong nung teintet rogo 220 arua tetendangba balala:- tenünk nung 70, tepu 32, teret 54, general 64 shilem agai tendanga liasü. Iba sentong nung Doctor tem - Dr. Asonla Aying Chang, Dr. Noktang Jamir, Dr. Esterlane Imchen, Dr. Imlikokla Longkumer

aser Dr. Zevi Shuya den parnok teyarier aser nurses 8 liasü.

ASTC aser CABA ajanga Doctor aser Medical team-i anagti nebu, mapang aser mozü tenlaba asoshi parnok nem tenungsang agütsüba den kanga pelaba metetdaksüogo.

Tarutsü anogo nung parnok sempet aser wadang tali maojang ta ASTC aser CABA sarasadem, ta Chumoukedima Ao Baptist Arogo tezülur Imlisunep aser Ao Senso Telongjem Chumoukedima Tongti Zulus Lensanir Sanglir nati külem sangdong ka ajanga metetdaksü.

GOVERNMENT OF NAGALAND DIRECTORATE OF SCHOOL EDUCATION NAGALAND :: KOHIMA

NO. ED/SCH/RIMC/EE/2024-25

Dated 13th August 2025

ADVERTISEMENT

Advertisement for admission of boys and girls to Class VIII in Rashtriya Indian Military College (RIMC), Dehradun, Entrance test for July 2026 term to be conducted on 07th December 2025 (Sunday).

- Both boys and girls are eligible to apply for admission to the RIMC, Dehradun. The candidates should be in the age bracket of 11½ to 13 years as on 01 July 2026, i.e., they should not be born earlier than 02 July 2013 and not later than 01 January 2015.
- Candidates should either be studying in Class VII or should have passed Class VII from any recognised school at the time of admission to the RIMC i.e. 1st July 2026.
- The written part of the examination will consist of three papers namely Mathematics, General Knowledge and English. The Mathematics, General Knowledge and English papers will be conducted between 0930-1100hrs, 1200-1300hrs and 1430-1630hrs respectively on 7th December 2025(Sunday). The date for the interview will be intimated at a later date only for those candidates who qualify in the written exam.
- Prospectus cum Application Form and booklet of old question papers can be obtained by making online payment on <https://admission.schoolmitra.com/#/admission/newEnquiry/6396eff3fc26e41841a5afd6> or speed post by forwarding self addressed slip and an account payee bank demand draft of Rs 600/- for General Candidates and Rs 555/- for SC/ST Candidates. The Demand Draft will be made in favour of "THE COMMANDANT, RIMC FUND", DRAWEE BRANCH, HDFC BANK, BALLUPUR CHOWK, DEHRADUN, (BANK CODE -1399), UTTARAKHAND.
- Application on prescribed form accompanied by 2 passport size photographs, Domicile Certificate, Photocopy of Aadhar Card (both sides), Birth Certificate issued by Municipal Corporation, ST/SC Certificate and original Certificate from the Principal of the current school with photograph attested stating the date of birth and class in which the candidate is studying should be submitted to the Directorate of School Education by 15th October 2025.

(SHASHANK PRATAP SINGH) IAS
Principal Director.



New Delhi, August 21, 2025: Tawa Supreme Court-i Delhi nung kibur maliba azü ajak shelters nung puoktsü tuyuba anema Brihostibarnü Jantar Mantar nung shiruru meiemertemi longkak aitba noksa nung angur.

GOVERNMENT OF NAGALAND
DIRECTORATE OF INDUSTRIES & COMMERCE

email: industrynaga@gmail.com
www.industry.nagaland.gov.in

No.IND/DEV/SA/78/95(Vol-II):

Dated Kohima, the 19th Aug.2025

NOTICE FOR STATE LEVEL HANDICRAFTAND TRIBAL TEXTILES AWARD-2025

The Directorate of Industries & Commerce invites applications from indigenous artisans of Nagaland for the State Level Award in the field of Handicraft and Tribal Textiles.

Eligibility Criteria:

- * Must be a bonafide artisan of Nagaland actively engaged in the handicraftand tribal textile sector for a minimum of five (5) years.
- * Must be 18 years of age or above.
- * Government employees are not eligible to apply.

Availability of Application Forms:

Forms will be available from 1st September 2025 at the Textile Branch, Room No. 62 (Top Floor), Directorate of Industries & Commerce, Kohima, on all working days during office hours from 9:30 am to 4:00 pm.

Submission Deadline:

Completed applications must be submitted in person to the same office along with samples/ articles to Textile Branch, Room No. 62 (Top Floor), Directorate of Industries & Commerce, Kohima, on or before 30thSeptember 2025.

Note:

1. Applications received after the deadline will **not** be considered under any circumstances.
2. Craft categories will be attached along with the forms.

Sd/-

(P. TokughaSema)

Director of Industries & Commerce
Nagaland, Kohima.

GOVERNMENT OF NAGALAND
DIRECTORATE OF TECHNICAL EDUCATION
NAGALAND, KOHIMA

Dt. Kohima, the 21st Aug., '2025.

NOTIFICATION

The interested candidates of NEET - (UG), 2025 are hereby informed that vide RIMS, Imphal letter No.ACADEM/ ADMN/UG/1/2025 dated 20th August, 2025, applications are invited for admission into MBBS course during Academic Session 2025-26 for the following seats:

- (i) EWS (Economically Weaker Section) - 11 seats
- (ii) Open North East (NE) - 10 seats

The last date of submission of filled-in applications to the Dean's Office is September 1st , 2025 upto 4:30 PM. Scan copies of the filled-in applications along with the required testimonials may also be sent by e-mail to - "admissions.rims.imphal@gmail.com" on or before the dateline given above. Counseling is fixed tentatively on 12thSeptember, 2025 starting from 10:30 AM.

The selection of the candidates shall be purely on the basis of merit (rank) in NEET-UG-2025

The following documents are required along with the application:

1. Domicile certificate/PRC (not the Temporary Residency Certificate)
2. Admit Card of NEET-UG Exam 2025
3. Score Card of NEET-UG Exam 2025
4. Age Proof Certificate
5. Pass Certificate of Class X and Class XII
6. Mark sheet of class XII
7. EWS certificate issued by the competent authority of the State from where the domicile certificate has been issued (for those candidates applying under EWS Category) valid for the year 2025-26.
8. Passport photograph.
9. Proof of payment of counselling fee - Rs. 1000/-

N.B: Candidates are advised to check the RIMS website (www.rims.edu.in) periodically for any update.

(ER. VIPULHOU LHOUNGU)
Director

भारत सरकार
कार्पोरेट कार्य मंत्रालय
त्वरित कॉर्पोरेट समापन प्रसंस्करण केंद्र (सी-पेस),
आई.आई.सी.ए. बिल्डिंग, 7वीं मंजिल,
प्लॉट P-6,7,8, से.-5, आई.एम्.टी. मानेसर, गुरुगाँव,
हरियाणा - 122050.
Email: roc.cpace@mca.gov.in



Government of India
Ministry of Corporate Affairs
Centre for Processing Accelerated
Corporate Exit (C-PACE)
IICA Building, 7th Floor,
Plot P-6,7,8, Sector-5, IMT Manesar,
Gurgaon, Haryana - 122050.
Email: roc.cpace@mca.gov.in

**FORM No. STK --6
NÜBORTEM DANG SANGDONGER**

[Pursuant to sub-section (2) and sub-section (4) of section 248 of the Companies Act, 2013 and rule 7 of the Companies (Removal of Names of Companies from the Register of Companies) Rules, 2016]

Public Notice: ROC/C-PACE/STK-2/248(2)/2025-26/1031

Date: 12/08/2025

Temetettsü :

Tenüng agientsüba maparen nung (1) Nagaland state nung Companies Act, 2013 kübok section 248 nung aliba company-tem itemi :

S No	Work Item	CIN	Company Name
1	AB5388136	U21001NL2023PTC013828	ACUIVITAL NUTRACEUTICALS PRIVATE LIMITED

2. Company Act, 2013 nung section 248(2) kübok ajemdaker yangi tekalen agüja aliba Company-tem nungi parnok tenzüker külen küm ka tsüngda mapa metenzüketba agi mesüra taoba küm ana tashi mapa kecha meinyaket süidaktsüba agi mesüra Companies Act, 2013 nung section 455 kübok shia aliba ama mapa meinyaki anena aliba company ama ayutsü asoshi mapang tasazük tsüngda application (s) magütsüba agi mesüra mapa meinyaki anenba company (ies) akümba agi / company incorporate asüdang nangzükbä ama subscription sen magütsüba agi aser section 10A/ nung sub-section (1) kübok shia aliba ama company incorporate ser anogo noklang ka ser tir tsüngda mesangdongtetba agi section 12 nung sub-section (9) kübok shia aliba ama tsüngdong oa reprangdangba sülen kecha mapa tenzüka maliba jangjangogo, aser parnoki parnok meyong register asüba company-ji anenadoknüba agi parnok tenüng company register nungi agientsü asoshi agütsüba application Registrar of Companies ket tongogo aser parnoki parnok tenüngji Companies register nungi agiendaktsünüa temepishiba agüja lir.
3. Anungji parnoki mepishiba ama, tekalen agüja aliba company-tem ya Companies Register nungi tenüng agientsü asoshi Registrar of Companies-i shidanger.
4. Nisung kari danga companies register nungi tenüng agientsü asoshi metetdaktsüba ya anema ken o agütsütsü lira , iba sangdong ya adokba anogo nungi zünga anogo semer tsüngda iba ken o ji yangi agüja aliba office address dangi yoktsü akok.

Raunak Agrawal
Assistant Registrar
Centre for Processing Accelerated Corporate Exit

CBC 07123/11/0350/2526

**Lok Sabha nung bill 12 aser
Rajya Sabha nung bill 14 agizük**

New Delhi, Luroi/August 21 (Agencies): Brihostibarnü tzüngluruwa mongpu Parliament senden tembangogo; Brihostibarnüa House anaprongla nung opposition züngsemtemi Bihar nung Special Intensive Revision (SIR) anema longkak aita liasü.

Tan mongpu Parliament nung Lok Sabha nung bill 12 agizük aser Rajya Sabha nung bill 14 agizükogo. Brihostibarnü Parliament nung Promotion and Regulation of Online Gaming Bill, 2025 agizük; Iba bill ya Lok Sabha nungbo Bodhbarnü agizüka liasü saka Rajya Sabha nungbo iba bill atema o melemtepi iba bill agizük. Iba bill kübok online ajanga sen asayaba ajak nokdangtsü.

Tan mongpu senden tetenzük anogo nung Jagdeep Dhankhar-i pa temang mejungi dang aliba kuli nung ajemdaker ajunghena tatong Tir menden nungi anena liasü.

Tan mongpu senden nung opposition-i akhangba ama Operation Sindoor onük nung o entepa liasü aser iba nungji Ato kilonser Narendra Modi aser Lok Sabha nung opposition lenir, Rahul Gandhi napronglai shilem agia liasü.

Iba onük nung o entepba mapang Ato kilonseri Congress aija, Congress-i sorkar aser army dak melung alemba dang nungibo Pakistan dak melung talembe ta aija liasü. Ano külen Rahul Gandhi-i, sorkari India nunger pilots sadema inyaksangshi mesüdaktsür aser Operation Sindoor ya Ato kilonser tenüng kümzüksü atema agiba dang lir, ta aija liasü.

Tan mongpu senden nungsa Lok Sabha Speaker Om Birla-i Justice Yashwant Varma'er

kidang sen crore aika anguba ken o bushisüngdangtsü atema züngsem asemi akümba committee ka tentetba sangdonga liasü. Iba committee nung züngsemtemji Karnataka High court nung senior advocate PV Acharya, SC judge Aravind Kumar aser Madras High Court nung Chief Justice Manindra Mohan Shrivastava nunger lir.

Tan mongpu senden tepiyong opposition INDIA teloktep nungi züngsemtemi Bihar nung SIR anema longkak aitba den külemi Election Commission aija aruogo. Talisa Congress Tir Mallikarjun Kharge, Rahul Gandhi, MP Priyanka Gandhi Vadra, Samajwadi Party lenir Akhilesh Yadav, TMC MP Mahua Moitra aser AAP MP Sanjay Singh-i SIR anema jembi.

Bodhbarnü Lok Sabha nung Union home minister Amit Shah-i ozüng alema inyakba lenirtem menden nungi agientsü atema bill asem benoka liasü. Ozüng alema inyakba ken otem nung apuba Ato kilonser, union minister tem, chief ministers aser minister tem menden nungi agientsü nükjidong nung item bill benok.

India nunger nüchiso anguba sülen tang mezüng linük tatong Tir election nung ruling aser opposition napronglai candidate tem South India nungi shimogo.

Iba election atema NDA-i Tamil Nadu nungi CP Radhakrishnan shim aser INDIA teloktepi Telangana nungi taoba mapang Supreme Court judge, Justice B Sudershan Reddy shim.

Tan mongpu Parliament senden July 21 nü tenzükbä sülen Operation Sindoor atema o entepba junga katetba dak alaka senden tepiyong opposition-i longkak aitba agi senden junga magiteti aruogo.

**PM Modi aser France Tir Macron
nati Ukraine nung rara atema jembi**

New Delhi, August 21 (Agencies): Brihostibarnü Ato kilonser Narendra Modi-i France Tir, Emmanuel Macron tena phone ajanga jembiba osang metetdaktsü.

Modi-i X ajanga, "Kü tembar Macron den jangratema sensaksemogo. Küinati Ukraine aser West Asia nung yimjung ken o jembiba ajanga rara anentsü atema tebilemba lemsatepogo. India-France tesendaktep tajungba akümtsü atema inyaktsü bangjemogo," ta metetdaktsü.

Macron-ibo, Russia Tir Vladimir Putin ya amokmeren

tuluka lir, ta ashir. Tawa interview ka nung jembidang Macron-i, Russia nunger nükjidongji Europe-i mangateti malitsüla, ta ashi.

Ano külen Ato kilonser Narendra Modi-ibo mangatettep ken o ajak bentettsü atema yimtenren jenjang nung yimjung ken o jembitsüla ta ashir.

Tawa Putin aser Macron naprongla den jembidang Modi-i, "Ukraine nung rara anentsü atema yimjung ken o jembitsüla, ibaji India tangatetba lir, aser iba dak sendakba nung India-i akokba tashi nungita yaritsü, ta metetdakja liasü.



August 21, 2025 nü New Delhi nung INDIA teloktep nungi tatong Tir candidate, B Sudershan Reddy-i nomination file asüdang tangokba noksa nung angur. Kasa noksa nung Congress Tir Mallikarjun Kharge, party lenir Sonia Gandhi aser NCP (SP) Tir, Sharad Pawar nungera angur.



TIR YIMYIM YIMOBILEM (EDITORIAL)

DIMAPUR FRIDAY, AUGUST (LUROI) 22, 2025

Nübertemi Independent meshir !

Naga nungertemi yimten nung nüchiso 'independent' asoshi raraba tongpang ya rararaa tongpang ana kümogo, kaji Naga yimten nüchiso bushirtemi India yimten talenba nungi chioktsü asoshi akanger aser ano Naga tongpang kaji Naga nunger nübertemi Naga yimten nüchiso asoshi rarartem tsüba meliner. Iba tensa tiaji yakanü Chümoukedima District Village Councils' Association purtemi Cease Fire Monitoring Group mendenbuba dangi Cease Fire mapang inyaksü renema aliba inyakyimtem meyipa reprangshitsüla ta takangba agüja züluba shiti nung angateter. Atangji, ibaji Naga nunger asoshi osang tajung masü, kechiyong külen India den Naga nunger yimten nüchiso ken o benoka jembirtem telok telemsa teimba-teimba akümer aser külen nübertemi India yimten tashi aketer dang Naga yimten nüchiso bushirtem ya timi azüoktsüla ta akanger. Tetezü, Naga yimten nüchiso bushiba maparen nung Naga nunger temulungjanga balala aser tebanga memedema ta sayur. Atangji, India o Naga nunger yimten nüchiso bushir teloktem na tsüngda yimjung "Ceasefire" lapoka lir, ajisüaka Naga nungertemi bilemdangtsüba kaji, yimjung mapang Naga nunger yimten nüchiso bushirtembo tesem tasazük ka nung dang lia atatsübaji, shitakba nungbo peisasa yangluba tepuokdak kidang puoka ayu amai lir. Aji oda, yimjungbo yimjung saka Naga nungertembo India yimteni agütsüba 'Id Card' bener dang jajatsü melaba tetezüji India-i süngzü alener jajadaksür. Iba tazüokba aser talenba nung Naga nunger nüchiso bushirtem ya lialia, joko tangbo Naga yimten nüchiso indang jembir masü saka 'Cease Fire' mapang ya kodaser takok ngua aotsü ta asüba onüktem dang jembir. Ano, kasaji nübertemia Naga nunger yimten nüchiso angutsüba indang masü saka tang Chümoukedima district nung alirtemi jembiba amaji 'Cease Fire Ground Rules' kübok Naga nunger yimten nüchiso bushitem timi azüoka ayutsü nüngdakba indangang jembir. Aji oda, tangari masü Naga nunger nübertemi Naga nunger yimten nüchiso asoshi rarartem lidaktsüba tesem "designated camps" ji ozüng raksartem aser NIA aser policetemi aputsü bushirtem jenokdak tesemang ka kümogo ta metetdaksüba ken o ji Naga nungertemi Naga yimten nüchiso angutsü imlaba teimla o masü. Ibaji dang masü saka Naga yimten nüchiso asoshi rarartem "Cease Fire" mapang nung alitsü lazüktsüba ' Designated Camps' ji nisungtem pua bener oa yangji yur tashiyim agi senotsü meshidak tesemang ka kümogo ta India ketdangser dang Naga nunger yimtak yimtsüng nung yimsüsürtemi metetdaksüba jagi Naga nungertemi Naga yimten nüchiso bushirtem dak tamang aser teimla samaba tamaitü sayur. Aji oda, Naga nunger yimten nüchiso bushirtem telok balala ter metsü kümer India-i lazüktsüba tesem " Cease Fire Designated Camps" nung ali tashi India yimteni Naga yimten akhüm metsübutü, kechiyong designated camps tetezü lazüka yutsüba tesem alema moi alitsü. Iba ama talenba nung lia, kodaser asenoki India den kasasa pei temeten o langzüktepa jembitettsü ? Independent indang jembitsü asoshi tamasa asenok Independent asütsüla ! Ano, asenok asoshi tebilemtsü kaji, Naga nunger nübertemi dena Naga yimten nüchiso atema rarartem tsüba agi parnokji designation camps alema mashi meyoktsüla ta India ketdangser dang ashitsüa litetba ya asütsü. Iba jagi Naga nunger yimten nüchiso bushirtem dak nübertemi temulung melemtetba aser mepelaba tuluka sayur. Iba amaji yimten nüchiso bushirtem o nübertem na tsüngda temulung melemtep, mepalatep aser tetsüngda ali tashi Naga yimten nüchiso asoshi rarabaji mopong arishir amai ka dang kumadoktsü. Koba kin aser yimten südir sang, yimten nüchisoji nübertem asoshi bushir, anungji yimten nüchiso asoshi hadir amshia rarartemi kechi ashir ta asüba dang nungibo nübertemi kechi ashir ta asüabajisa yimten ken o jembiba sabang nungbo tongtibangba akümer. Aji oda, yimten nüchiso bushirtemi kechi ashir ta asüba nung latettsü asübo Naga yimten jenjang ya lateter süla, ajisüaka nübertemi kechi ashir ta asüba nungang yimten ken o bo latettsü asünungji, ashiko, iba mapangji ka atar asütsüa akok . Ibaji meteta, nübertemia 'Cease Fire' maparen akangshitsüba indang kisüng masü saka Naga yimten ken o latettsüba nungang shilem tuluba agitsü nüngdaker.

OLEMSABANG

THEOLOGICAL DEGREE ASER TITLE AMSHIBA

~ Wati Longchar (Ekhrani Pathar)

Theology ya arogo aser tenyaba mapa balala nung tenzüktsüba atema azünger. Ya tanga secular mapa ka inyaksü asoshi masü. Alima nung alir asü nung lanur tatema Govt.i recognize asüba aser tanga national/international theological Institutions tesendaktep nung atenba jagi angzükteper, aser jenjang tajungba yanglur. Asia ama kong Khristan tamanger onsara tila, aser secular democratic world nung university balala nung religious study sadema melapoktsür asü nung accreditation body tat. agi ATA, ATESEA, ATEM, PERSETIA, etc aika lir aser item accrediting body ajanga theological college nung liromedem adokdaksütsü inyaker aser degree balala recognize suteper. Asia country teimba ka nung PhD degree ya Govt.i recognize masür ta ajiteta, ni inyakba (FTEAP) achaayanga Asia-Pacific Theological Union (APTU) ta tenteta PhD degree sangküm nungi tenzüktsü mapadong tenzükogo. Country koba nungsa PhD degree Govt.i recognized mesui lir parnokji APTU-i agütsüba academic standard agizüka agütsüra item degree accreditation agütsütsü (not affiliate) aser alima rangpen theological colleges nung agizüktettsüa sentaktepa yanglutsü mapadong tenzükogo. Saka tongtibangtiba kaji Institution koba nung tanü tensa den peta, tanela aser lokti yanglushitsü Lai tejangja sayua lanur ka ochi nung Tsüngrem tenzüktsü molutetter yoker aji kanga tongtibang lir. Saka Khristan tenzükba ya koshi koshi tenzükba maparen ka masü. Degree aser research akaba den Tsüngrem tenzüktsü tajaba tejangja akaba nubu alimai nungdaker.

Kecha tazüokba ka makai theological college mashi mashi lapoka aoba ajanga tangari theological degree ya nala nunga angur ta luja jembitsüba angashiogo. Student rakteper asü nung insitution aikati "Govt. recognized", "UGC recognized," "University recognized" ta advertise asüba angur. Ya tim masü aser student-i court nung challenge asü nungbo lendongi aitsü. Ya tekümdangtsü tulu ta metetdi. Advice magi küm asem-pezü zünger külen aikati sasaa jembiba angashiogo. Anungji tetenzük nungi kanga dang kümdanga institution shimtsüla ta ajungshir. Mapang ka nungbo, aya ta sasaa bilemtsü.

Ano asen lima nung "Doctor", "Reverend" title kanga sashia amshitepba angur. Rev. Dr. ta title amshi nungbo lokti nung "you become somebody" ta ajiteta business minded nisung kari doctoral degree ya bazar amai, talisa South India, kümogo. Meeting kati South India alu nung, mesura sickman alu nung "Doctor" kümer atuba lir. Ya bazar nung aliba oset ka masü, saka ya earned degree. Secular degree mali, mesura theology-a mazüng sur nung "Doctor" certificate alir külem title amshiba aika angur. Rs. 5000 or Rs. 10,000 (Rs. 15,000 tanü asüng ta tuogo ta angashir) agi alitsü akok. Ibala doctor degreeji sen dang lirbo gate keeper or sweeper katia alitsü akok. Adianu aser medemer dang meshir külen alitsü akok. Mazüng sur nung sen agi alir iba title amshitsü makok. It is illegal. Illegal business nung asenok sen meindokli.

DMiss, DMin ya University mesura accrediting body ka ajanga course work den thesis zülur degreeji agütsür. Küm 3 nungi 5 tashi züngerang iba degree angur. Itemji ministerial or professional degree aser parnokji "Doctor" title amshitsü akok. Asen Aor DMiss aser DMin (ATA nungi angua dena) anguji 25 shi ka dang asütsü.

PhD, DTh, D.Theol. (or even DD) ya academic degree. Yabo specialized academic degree aser B+ nung master degree passed sua alirtem, Common Entrance Test Examination pass asütsüla, assessment papers, publication, ajak abensa inyaker küm 3-7 tashi thesis zülur aser thesisji defend sur külenang degree nguteter. Parnokji dang teaching nung amshir aser MTh aser doctoral thesis guide asütsü melar. Parnoki "Doctor" title amsitsü akok. Theology nung academic doctoral degree angurji asen Aor 70 shi asütsü.

Official ama nung DMiss, DMin, PhD anguri "Doctor" ta amshitsü akok, tetezü academic or ministerial mapa balala, program balala nung "Doctor" ta amshibaji tim because it is an earned degree. Anungji earned degree aser bazar nung aliba degree koda balala aji metetdi. Saka iba title ya mashi mashi nung amshitsüba masü. Tangari title enokba, ajaba dak alaka, ni kaket züluba cover nung, ocet züludang aser self introduce asüdang kodanga Rev. Dr. Prof. sobutsü ya mamshir. Kechiaser ya konang naroküm ka masü, saka nubur tenzüktsü asoshi khuret ka amai agütsüba title ka dang lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

India nung Khristanem anema inyakba atema Odisha nung longkak ait



August 19, 2025 nü Rourkela nung Bishop, Kishore Kumar Kujur leniba nung Khristantemi longkak aita jajaba noksa nung angur. Odisha aser India tesem balala nung Khristanem anema inyakba anema parnoki longkak ait.

August 21, 2025: India tesem balala nung Khristanem anema inyakba kanga bulua akümer, ta metetdakja August 19, 2025 nü Odisha state kübok yimti ana nung Khristan 10,000 dak temai longkak aita yimdong süa jajaogo.

Rourkela Diocese nung Bishop, Kishor Kumar Kujur-i, "Odisha aser India tesem balala nung ajungbena putirtem, nun tem aser Khristanem anema inyakba kanga bulua kümogo," ta metetdaksü.

August 20 nü osangbener den jembidang Kishor Kumar Kujur-i, "India nung anogo shia Khristan ana mesüra iba dang nungi tali anema inyakba ya Khristan asüba agi lir," ta ashi.

Rourkela nung Khristantemi longkak aita jajaba sülen Kujur den Khristan lenir 20-i district ketdangser Dheenah Dastageer nem temepishiba shidi ka agütsü.

Kasa anogo nungjisa Sundargarh nunga Khristantemi longkak aita jajaba sülen district collector, Subhankar Mohapatra nem temepishiba shidi ka agütsü.

Shidi nungji India tesem balala nung Khristanem anema inyakba kanga bulua akümba

indang metetdakja lir.

"Putirtem, nun tem aser pastor tem amaker aser loktii Tenla kitem raksatsür. Tiyazü nung Khristanem nem tai tongloktsür, tesünep raksatsür aser linük telongjem raksatsür," ta shidi nungji shia lir.

India Ato kilonser Narendra Modi aser linük Tir, Droupadi Murmu na dangi züluba shidi nungji linük nung Khristanem kümzüktsü atema sorkar nem inyakdaksüner, ta mepishia lir.

Shidi nungjisa tawa India tesem balala nung Khristanem anema inyakba tatalokba kar metetdakja lir. Item rongnung July 25 nü Chhattisgarh nung police-i nun ana apuba sülen amokmerenba tatalokba densema lir. Nun anaji anogo 9 nü tashi jail nung puoka ayuba sülen tesüsa bail nung chiokogo.

Sundargarh nung longkak aitba sentong lenir ana-Protestant putir Pratap Pradhan aser John Lakra nati, yimtenren nung ajemdaker tasü aitba teloktemi Odisha, Chhattisgarh, Jharkhand aser Uttar Pradesh state tem nung Dalit aser tribal Khristanem amaker, ta metetdaksü .

Sundargarh Christian

Council Tir, Ignace Hasda-i, "Khristanem anema inyakba kanga bulua akümba ajanga tetsübu aitdaksüogo aser Khristanem yimdak aser jilatem nunga sadem-sadema mesenzüteter," ta metetdaksü.

Divine Word putir, Ashok Minz-i, tesem ajaklen Khristantemi longkak aiter, anungji sorkari Khristanem aser Tenla kitem atema security agütsütsüla, ta metetdaksü.

All India Catholic Union Odisha unit Tir, Anthres Tigga-i, joko BJP den sendaktepa aliba teloktemi yimtsüngtem nung Khristanem sarasademba sentong aser Khristanem tasoba anogomong benjung nunga timtem agütsür, ta metetdaksü.

Khristantemi sarasadem sentong aser tekülem sentongtem agibaji tangartem Khristan yimsü dangi meypdaksütsü atema lir ta tai tongloktsür, ta Tigga-i ashi.

Tigga-isa, sorkar ketdangsertem aser yimtenren lenirtema aika Khristan school tem nung zünga liasü, anungji Khristanem tekülem sentong agiba ya yimsü meypdaksütsü atema masü ta parnoki kuli agütsütsüla, ta metetdaksü.

Uganda nung Khristan yimsü dangi meyipar Islamic tesayur ka dak azük

Nairobi, August 21 (Agencies): August ita tetenzüklen Uganda nung Islam yimsü tesayur kati mosque nung mangdang ka anguba sülen Khristan yimsü dangi meyipba atema par kinüngertemi pa dak azük, par ki bendoktsü aser pa kinüngtsü den tanur trok puer ao.

Arrshi küm 39, Wambuzi Maka Uthman ya sheikh (Islamic tesayur) ka liasü. Hokolbarnü sarasadem sentong nung shilem agitsü atema pa August 1, 2025 nü Mayuge District-i ao aser mosque telung nungji amoi oa liasü.

Osangbener den jembidang pai, "Ni amoi oa aliba mapang nung ni tebur ka süoshi temesüng semer kodak tenyar pezüi longbanger angu. Iba

nisungba jagi kü dang, 'Uthman, Uthman, Uthman,' ta asemben aja. Ni kanga aoksa aser ni pa anasa aoba sülen Pa matsüngdang apudaker Pa külemi liasü. Iba sülen Pai kü dang 'nü nüburtem dangi oang aser taküm aliba Tsüngrem dangi meyipang ta shiang' ta tuyua liasü," ta metetdaksü.

Nikongdang 5:00 ako meta pa kidangi shilangba sülen pai Elim Arogo nung pastor ajurua pai anguba mangdangji lemsatepba ajanga pai mangdang nung angubaji Issa (Yisu) liasü ta jangja.

August 4 nungi pai pa kinüngtsü, par chirnurtem aser par kiyongertem den tama Yisu Khrista indang lemsatepa liasü.

Uthman-i, "Ni Yisu indang jembiba ajanga kinüngtsüi ni

sowar kümogo ta bilem. Lai lar adianutem dangi oa ni kuli asüba indangji metetdaksü. Ni sowar kümogo ta bilema parnoki ni Butabika medical center-i anir aotsü sentong yanglu," ta pai metetdaksü.

"Ni parnok danga mangdang nung Yisu ajuruba lemsatep. Iba mapang nungji küdii kü dak azük tenzük, iba sülen tangartemia azük. Ajisüaka tia kaa ni jena otet," ta pai metetdaksü.

Pa yirua alibaji ngua kiyonger kati pa hospital-i anir aoba sülen hopta ka shi among.

Kinüngertemi par ki bendoktsü aser pa kinüngtsü den tanurtema puer ao.

Pa August 11 tashi hospital nung amongba sülen tang ki ka nung mimshia jenoka lir.

ANOGO ABEN TSÜNGREM DEN

Takok Rongsen

- T.Ken 119: 161 - 168

"Temakzükba oset angur nisung amato; ni ne O nung pelaseta alir" (t. 162). Rongsen tuluji asenok kodang angu? Yimya agi tongpang rara ka sülen rongsen tuluji angur. Iba tekong nung asen taküm nung tongpang rara ka tenzükba indang sayur.

Shi nisung mesüra yimya koloki Laishibaji tazüokba nung azüngtsü aser bushitsü mejangrar. Alimai aji maginer. Alimai Laishibaji sentoker, tiyazü aser amajok tebilemba nung amangdaksüner. Satani Laishibaji sempar. Asenok koda sür Laishiba nungi piladaksütsü pai pa tajungtiba inyaker.

Aji asü nung Laishibaji tejak o tejak na chitepa raradak ka akümer. Asenoki Laishibaji jangraa mezüdaksütsü asoshi Satani jangratemtsü kaket aser magazine tamajung aika adokdaksür aser agütsür.Laishiba melen item kaket tamajungtem azüngba ajanga Satani asenok taküm nung takok ngudaksür.

Atangji Laishibaji takok rongsen lir. Iba nung takok angutsü asoshi ken ken rarateper. Saka ano idakji tepela lir. "Temakzükba oset angur nisung amato, ni ne o nung pelaa alir" (t. 162). Laishiba azüngba, bushiba aser ibaji rizünga ayubaji lenmang tajung ka lir. Taküm lenmang nung aibelen masütsü asoshi Laishiba nung kechi jungkai adoka sayur aji ne mulung nung rizünga ayutsüla. Laishiba bushiba jagi asenok taküm takar kümdaksür. Lai bushiba jagi o ji dang angatetdaksür masü saka na Tezülurji tali mesüka kümdaksür.

Tamangertem shirnoki Laishibaji azünger aser bushir parnok anema Satani tongpang rara jazüker. Kechiaser nai kodang Laishibaji azünger aser bushir na Yisu mesük tali akümer.Nai tongpangji kokra, temakzükba oset nungji na pelaa alitsü. Tsüngrem O bushiba jagi na takar kümdakjang.Rongsenji agiang aser Laishiba bushiba tepelaji ne meyong kümang.

Arogotem dang Middle East nung yimjung atemasarasademtsüajungshir

August 21, 2025: Church of England (CoFE)-i Arogotem dang taruba ita tanga Arogotem den külemi Gaza, Israel aser Middle East nung yimjung atema sarasademtsüba nung shilem agiang, ta mepishia metetdaksüogo.

September 21 nü Middle East nung yimjung atema sarasademtsütsü atema Khristan melungtet teloktem aser aid agency temi ayongzüka lir. Iba sentong takok angutsü atema parnoki Arogotem den senteper inyaker.

September 21 anogo ya UN International Day of Peace anogomong lir.

Jerusalem nung Anglican Archbishop, Dr Hosam Naoum-i Arogotem nung sarasadem lenitsü atema

sarasadem onük lemsatepa lir. Iba anogomong nungji Arogotemi Gaza-Israel rara anentsü, pua alirtem ajak chioktsü aser Gaza nung chiyungtsü agi anüngertemi teyari angutsü asoshi sarasademtsütsü. Iba dak alia

ken o jembiba ajanga teti asoshi yimjung latettsü asoshi Arogotemi sarasademtsütsü.

Iba anogomong atema sarasadem leniba onüktemji ecumenical groups Churches Together in England aser Churches Together in Britain & Ireland indang websites nung angutsü.

Iba dak alia taruba itatem nunga maneni Arogotemi sentong balala ayongzüka agitsü, aser item sentong atema osang tejangjaji mapang nung sangdongtsü.

AO OSHI ANGAZÜKDAK:**TANÜ ANGAZÜKTSÜBA OJANG****Tesüki**

(v) jashiba agi bilemba ama masü jembiba (sarcasm, satire)

* Moabai jembiba tesüki o ajaki angateter.

Tesülen

(adv) tang masü, tarutsü nung (later on)

Onokbo tesülen dang chiyongtsü ataa liasü.



Tir Yimiyim

OLONG PAITEP # 7247

	1				2			3		4
5								6		
7			8							
								9		
		10								
11										12
					13					
					14					
15										

TIPIEN

- Balaka
- Aika shirangba
- Tar tatsü
- Nenü'er jabaso
- Sen latettsüba
- Tangar kübok alir
- Lon nung inokba
- Tzü ayimdak
- Ajak

LANGTSÜNGLEN

- Hai sür inyak
- Aor tenüing ka
- Ali telungi talangka lur
- Tebang kenyongi mazüoker
- Ken atema anenzükertem
- Toktepa noktak
- Sen
- Benjong agi
- Telung nung rizünga ayu
- Tebang nung enok

OLONG PAITEP # 7246 TELANGZÜBA**TIPIEN :**

- Aben, 4. Artsü, 7. Lisem, 8. Liwa,
- Sarasadem, 12. Aket,
- Mangu, 15. Anünü, 16. Ango.

LANGTSÜNGLEN :

- Aruli, 3. Balala, 5. Suwar,
- Belem, 9. Süjak, 10. Aonung,
- Dokan, 13. Tinu.

NAI-A YA METETTER MA

Ajaki kanga sapua aliba aser internet nung nüngtugu obendanger Frank Caprio arishi küm 88 buba nung süogo.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimiyim bureau tem nung agüjang.

MHA-i sensaksem atema United Naga Council jaokogo

Imphal, Luroi/August 21 (Agencies): Ministry of Home Affairs (MHA)-i, arrtsü nung atsü atsüba aser Indo-Myanmar arrtsü nung Free Movement Regime (FMR) aginba dak sendakba nung sensak asemtsü atema Manipur nung Naga nung lakti tentet tongtiba United Naga Council (UNC) jaokogo.

Iba senden ya August 26 nü New Delhi nung amentsü, ta ketdangsürtemi Brehostibarnü metetdaksü.

MHA indang Advisor (North East) A.K. Mishra-i, iba sensaksem nung shilem agitsü atema UNC jaokogo.

Naga nung lakti tentet yagi arrtsü nung atsü atsüba

aser FMR aginba anema arudar aser ashiba agi, iba jenjang agiba ya Naga nung tetsü tasoli atema amokmeren ka lir.

India sorkari Myanmar den arrtsü nung sen crore 31,000 intoka km 1,643 atsü atsütsü sentong yanglua lir. Bendangertem linüki senoka aitba, shibelenertem aser tanga ozüing alema inyaksangshiba nokdangtsü nükjiding nung iba atsü atsütsü sentong lir.

Ajisüaka Naga nung aser Kuki nung lakti tentetemi iba jenjang agiba anema nokdaka arudar.

FMR ya 2018 küm India indang Act East Policy kübok benok aser iba ajanga linük

anaprongla nungi nüburtem arrtsü nungi km 16 tashi visa makai senzusenpongtsü atema temelaba agütsür.

Ajisüaka MHA-i, linük security kümzüka ayutsü aser Northeast state tem nung d e m o g r a p h y memelenshidaksütsü atema FMR ya aginogo.

Centre-i, Manipur nung Tengenoupal district kübok Moreh nung km 9.2 tashi atsü atsüatokogo.

India aser Myanmar na Manipur (398 km), Arunachal Pradesh (520 km), Nagaland (215 km), aser Mizoram (510 km) nung arrer aser Border Roads Organisation (BRO)-i Manipur nung atsü atsüa odar.

Assam: Corporate nem ali agütsüba atema Karbi nungertemi longkak ait

Guwahati, Luroi/August 21 (Agencies): Assam sorkari tribal tem indang ali corporate house tem nem agütsütsü telemteba agiba anema Karbi Anglong district headquarters Diphu nung Bodhbarnü nüburtemi longkak aita liasü.

Karbi Anglong ya Assam nung Constitution Sixth Schedule kübok yimsü asüba tesem asem rongnung ka lir, koba ajanga special autonomy ka agütsür aser tribal tem temeden kümzüka toktsür. Diphu ya Guwahati nung km 240 shi pilar lir.

All-Party Hills Leaders Conference tir Jones Ingti Kathar-i iba longkak aitba sentong agi aser parnoki

Bharatiya Janata Party-i aniba Karbi Anglong Autonomous District Council indang Chief Executive Member Tuliram Ronghang aija liasü. Longkak aiteremi, BJP-i lisopurtem tejangraba sentoka toktsüba anema yimiyim ayima longkak aita liasü.

Gauhati High Court judge kati state sorkari kidanger Dima Hasao district nung ali bihga 3,000 Kolkata nung amendaker aliba private company ka nem agütsütsü telemteba agiba süoki ia bilemba lemsatepba sülen Karbi Anglong nunga asendenshir longkak aita liasü.

Assam Jatiya Parishad tir Lurinjoyoti Gogoi-i, tribal tem

jenjang mejungi aliba sentoka toktsür corporate entities tem den longjemer inyakba atema Ronghang aija liasü.

"Council tekolakbai sen crore 200 ki asür saka tenem nung alirtem khen atema semtu sür idakji lidaktsür. BJP-i corporate tem nem ali agüja item loktitem sobaliba aser rongsenketzüng maitsü raksatsür," ta Gogoi-i ashi.

Assam Congress tir Gaurav Gogoi-i July ita tang teyangludak aliba ki ka indang video ka lemsatepba den Ronghang dak rangloker Chief Minister Himanta Biswa Sarma indang tembar ka ki ta ashiba sülen iba ken o ya kanga tedangshi mejungi kümogo.

Morigaon jail nungi tepuoker ana jena ao

Guwahati, Luroi/August 21 (Agencies): Assam kübok Morigaon district jail nungi tepuoker ana jena ao, aser tena jena aoba sülen ghoda 48 sülena police temi tena koleni ao mejangjar, iba ajanga tepuokdak security indang ashishi tenzükogo.

Tepuoker ana ya Jiarul Islam (23) aser Subrata Sarkar (33) ta jangjaogo aser tenaprongla ya Jagiroad police station kübok kasa yimtsüng nungi lir. Tena ya Protection of Children from Sexual Offences (Pocso) Act kübo aija küm 20 atema tepuokdak yua liasü.

Ketdangsürtemi ashiba agi, tena yagi hacksaw ka amshia tawa yangluba barrack ka indang kichiba grill rangpoker

jena ao. Tenati lungi, bedsheets aser gamosa tem amshia jara pongdanga ajen.

Tepuokdak ketdangsürtemi tena jena aoba ya Bodhbar anepdang 5 ako nung jangja aküm aser tenati amshiba hadirtem nguteta liasü.

"Tena jena aoba ya taoba küm October 11 nü tepuokdak rakpoker undertrial tepuoker pongu jena aoba den mesükteper," ta ketdangsür tejen kati ashi. Temetetsü kaji Jiarul ya tepuokdak nungi jena aoba item tepuokkertem rongnung densema liasü.

Tepuokkertem rongnung ka arakseta sür aliba ngutetba sülen tanungba tepuokkertem ya pua liasü. Iba mapang Jiarul ya Andhra Pradesh nung apu.

Iba tatalokba sülen ketdangsürtemi tepuokdak staff tem mapa nungi suspend sütsü, kong jailor aser warden tem densema liasü aser tepuokdak security-a asadangshia liasü.

Ajisüaka tang taoba küm ama kasa atalokba ajanga inyakyim melenshiba ya tapet masü mesüra junga benoka inyaksangshi masü ta angateter.

Ketdangsürtemi tensa asadangtsü atema Inspector-General (Prisons) yokogo aser jena aoertem bushi tenzükogo.

Ajisüaka tena taomung mejangjaba aser Jail Minister Rupesh Gowala-i ola madokba ajanga iba ken o achayangba dak sendakba nung taitsüba aika adokogo.

Russia-i Ukraine nung tang tesashiba amaker

Kyiv, Luroi/August 21 (Agencies): Russia-i Ukraine dak drones 574 aser missiles 40 khaloktsü, koba hopta ishika tsüngta amakba rongnung tesashitiba alitsü, ta Ukraine ketdangsür temi ashir.

Anüolen Lviv yimti nung drone aser missile amshia amakdang nisung ka asü aser south-western Transcarpathia region nung amakdang nisung 15 yiru.

US Tir Donald Trump-i anir iba rara anendaktsütsü meranga mera balala agiba mapang ka nung Russia-i maneni amaker, aser Ukrainian Foreign Minister Andrii Sybiha-ia iba ya ajanga rara tatem kati arudaktsütsü ya kanga tongtipang ta sayur, ta ashi.

Tir Volodymyr Zelenskyy-i ashiba agi, Russia Tir Vladimir Putin den neutral Europe - Switzerland mesüra Austria nung ajuruteptsü Ukraine renema lira ser Istanbul nunga kecha masü.

Zelenskyy-i Putin den mashi yimya nung ajuruteptsü mulunga lir ta shia lir, ajisüaka Budapest nung ajurutsü tanübo temela masü ta shia lir.

Trump-i Alaska nung Putin ajurua aser iba sülen Hombarnü White House nung Zelenskyy aser European lenirtem den ajurutepta sülen indang-indanga ajurutepa jembishinütsü sentong ya yanglur.

US tiri mezünbo Putin aser Zelenskyy par asem senden amentsü indang ashi, saka tangbo pai shilem magitsü akok

ta ashir. "Tangbo ni maden tena ajuruteptajungba... Nüngdak süra nia aotsü," ta pai ashi.

Bodhbar aonung nungi Brehostibar anepdang tashi Russia-i drones aser danga missiles khaloktsüba Ukraine indang air force ajanga züngdangba 614 züngtet aser parnoki 577 soit ta ashi. July ita sülen anünglen nungi amakba rongnung ibai tulutiba alitsü.

Russia-i yimya agi anüdoklen regions nung front lines anasa rangloker amaker, saka tang tesüsa amakba nungbo anüolen tesemtem nunga kongshi. Parnoki hypersonic, ballistic aser cruise missiles tem amshi ta foreign minister-i ashi.

Ukraine air force ajanga ashiba agi, missiles aser drones ya aika Russia anüolen aser Black Sea nungi aru aser missile ka Russian-occupied Crimea nungi aru.

Lviv nung nisung ka tepset aser asem yiru, kong nisung aliba ki aser nursery ka densema civilian buildings 20 dak tema raksatsü.

Ano south-west tsütsü Hungary aser Slovakia nungi kanga talangbo mepilai Transcarpathia kübok Mukachevo jila nung US electronics firm ka nung cruise missiles khalokja nisung 15 yiru.

"Missiles kati ozü westernmost region nung tongtipang American electronics manufacturer ka nung kongshia kanga sashia raksatsü," ta Sybiha-i Brehostibarnü social media nung zülü.

Iba plant nung coffee machines aser kidang amshiba osettsüset yanglur, ta ketdangsür temi ashir.

Brehostibarnü osangbener den jembidang, tang tashi Moscow-i iba rara tembangtsü asoshi jembishinütsü tebilemba tejangja mesayur, ta Zelenskyy-i ashi.

Ato Kilonser Viktor Orban ya Moscow den tesendaktep tajung aliba yong Budapest nung senden amentsü tejangraba mali ta jangja-jangja pai Brehostibarnü ashi. "Orban indang policy ya Ukraine anema lir ta ashir masü, saka Ukraine bhukumba anema lir."

Yimjung ken o jembitsü asoshi Hungary yimtiba nung ajuruteptsü sentong ya yashi-yakünü ang temai adok aser Hungarian Foreign Minister Peter Szijjarto-ia Budapest-i telemsa makai achayangtsü renema lir ta ashi.

Russian sepaitem southern front line nung Zaporizhzhia region nung adenshir ta Ukraine leniri ashi, koba Russia-i par meyong ta kibur akumba Ukraine indang region pezü rongnung ka lir.

"Parnoki par sepaitem Kursk tsütsü nungi Zaporizhzhia leni nabebe yokba onoki angur."

"Anogo 7-10 tsünga onoki security guarantees architecture indang angatetner. Aser iba tangatetba nung ajemdaker, US Tir Donald Trump dena trilateral meeting, amentsü nükjidong lir," ta Zelenskyy-i Brehostibarnü ashi.

Gaza City amaktsü lia Israel-i reservists 60,000 ajar

Jerusalem, Luroi/August 21 (Agencies): Gaza City ajunga amokbangtsü asoshi sentong ka yanglua lia Israel mitkari reservists 60,000 shi ajar ta ashi.

Reservists tem ya duty atema September ita nung arua tenüng agütsütsüla aser parnok ya timba active-duty personnel asütsü, ta mitkar ketdangsür kati ashi.

Iba sentong asoshi renemshiba nung shilem ka ama sepaitem Zeitoun aser Janalia tesemtem nung oa lir ta parnoki ashi, koba Defence Minister Israel Katz-i Mongulbarnü mela aser hopta tatemlen security cabinet nung benoktsü.

Gaza City nung aliba Palestine nung meyirijang aika dang ainshitsü totuyuba agütsütsü aser parnok Gaza south leni yoktsü.

Israel tembar linük aikati iba sentong ya aitsüogo, aser UN aser non-governmental organizations temi ano tashiyim amshia amakba aser nübur ajunga tesem balalai prokshidaktsüba ajanga ita 22 raraba sülen nisung meimchirtem dak tesüngmangtsüka mejungi kongshitsü ta ashir.

Ceasefire alitsü aser pua alirtem chioktsü asoshi taoba ita dangar ajanga jembishinüba

nung tamakok anguba sülen Israel sorkari Gaza Strip ajunga makdoktsü tebilemba sangdonga liasü.

Asendenshir amak metenzükdang region nung tetsüngtai ia yimjung ken o jembir temi agreement ka agiteptsü meranger aser anogo 60 rara anena atatsü aser tang tashi Gaza nung pua aliba nisung 50 nungi tesadang ka chioktsü asoshi proposal tasen ka agüja lir, koba Hamas-ibo Hombarnü agizükogo ta ashir.

Israel-i tang tashi telangzüba agüja mali, saka Mongulbarnüa Israel ketdangsür temi tezüngzüktep shilem ka kisüngbo joko magizüktsü aser pua alir ajak chioktsüsa tezüngzüktep ang agitsü ta ashir. Pua alirtem ya 20 ang takum lir ta amanger.

May ita tenzüka Operation Gideon's Chariots phase tanabuba atema renemshiba nung shilem ka ama reservists 60,000 ajaba totuyuba ya Bodhbarnü agütsüogo, ta Israel Defense Forces (IDF) ajanga ashir.

Iba den külemi reservists 20,000 taoba mapang jaoka alirtem nem parnok nem tang totuyuba agüja aliba atsülanga osang agütsütsü.

Gaza City telung aser temeket nung tanem-tanemi

aser operation shidak agitsüba sentong senior commanders temi melaogo aser anogo ishika tsünga chief of staff, Lt Gen Eyal Zamir-i tatem kuma renemtsü imlar, ta Israel mitkar ketdangsür temi ashi.

Gaza City amakba nung division pongu shilem agitsü imlar, ta ketdangsür temi ashir.

"Operation tembangba sülen Gaza tejak melenshitsü aser tesüiba mapang reprangba ama masütsü," ta Defence Minister Katz-i Mongulbarnü ashi.

Gaza City nung alirtem al-Mawasi area densema territory south len andentsü sentong ka pai agizükogo, kong mitkar temi chiyongtsü lema agütsüba tesem aser field hospitals tali amenok tenzüko.


Hamas-i pua alir ajunga chiokdaktsütsü aser Palestine nung telungpur madak takok angutsü mitkar nükjidong lir, ta Ato Kilonser Benjamin Netanyahu-i shia lir.

Hamas-i anir Israel south tsütsü October 7, 2023 nü amakdang nisung 1,200 tepseter ano nisung 251 pua bener aoba ajanga Israel mitkari Gaza amak tenzük.

Iba sülen Gaza nung nisung 62,122 tepsetogo, ta Hamas meyong health ministry ajanga ashir.

Menungra Bilemteter

Ochishir bilemtetbaji temoatsü ka lir
Apijemtsü Shin 10:7



Temeim Obala aser Oboula **Asür Sosangzüngba** (Chuchuyimlang) sür küm 50 ajungba anogo nung pai kinungertem aser pa meketa alirtem asoshi mapa tajung inyakbatem tanü menungra bilemteter.

1975 küm August 22 nü na Tsüngremi jar oaka onoki nü tsüngchi otem aser temeim kodanga mamatoker.

~ *Chimur, Anük-Amo, aser Semchirtem*

Office of the MOPUNGCHUKET AIT LAISHIR TELUNGJEM

Tenüngsang Agütsür

Mopungchuket Ait Laishir Telungjem (MALT) nungi iba tezüluba ajanga wadang balala nung alakteta takok angur züngsem tajungtem nem tenüngsang agütsür:

- EDENSEM**, S/o. Wb. Zulutemjen Jamir & Lt. Emnasenla, NSSB/CASE (Clerical & Allied Services Examination) 2024 tatidang nung LDA cum Computer Assistant, Department of Works & Housing (NPWD) (District) jenjang ajangzük.
- KAJENSANGLA LEMTUR**, D/o. Wb. Tongpangyongdang & Wt. Senatola, Guwahati University nungi M.A English Language Teaching nung Gold Medal jenjang ajangzük.
- CHUBAMENLA AIER**, D/o. Wb. Taliwati & Wt. S. Aienla Jamir, Nursing Officer Recruitment Common Eligibility Test tatidang ajangtetta AIIMS CAPFIMS, New Delhi nung posting angu.
- AOCHIBA JAMIR**, S/o. Wb. T. Shilu Jamir & Wt. Asangla, IBPS PO 2024 tatidang ajangtetta takok ngua liasü.
- S. TEMSULAAO**, D/o. Wb. S. Apok Jamir & Wt. Merangla Aier, St. Joseph University Chümoukedima nungi "Production, Productivity and Marketing of Spices in Nagaland: A case study in Peren and Chümoukedima District", onük nung ajemdaker Doctorate degree nguteta liasü.
- IMLISONGLA AIER**, D/o. Wb. Yaryongdang Aier & Wt. Yabangla Jamir, Indian Institute of Technology Delhi nungi "Development and Impact Assessment of Improved Biomass Cookstoves in Rural Communities", onük nung ajemdaker Doctorate degree nguteta liasü.
- MERENSENLA JAMIR**, D/o. Wb. Nungsangwabang & Wt. Amenla Tonger, Nagaland University "The Ao Naga Customary Law in the context of Article 371(A) of the Indian Constitution", omen nung ajemdaker Doctorate degree nguteta liasü.

Tematiba Tsüngremi parnok tarutsü wadang aser taküm maneni moajangma.

Sd/-
Ayimjem Jamir
Tir

Sd/-
Imlikumzuk Aier
Tongti Zülur

Imsongunger Kidong, Ungma Imlang, Mokochung. TENÜNGSANG AGÜTSÜR

- Wb. Mapusosang Imsong** S/o Lt. Sakunungba Imsong, promoted to Deputy Registrar, Cooperative Societies, Govt. of Nagaland .
- Wb. Taliwati Imsong** S/o Lt. Busutemjen Imsong. Awardee of District Commendation Award 2025 on 79th Independence Day.

Nenati tamaba jenjang ngutetta konang nüngsang tulu bener aruba asoshi Imsongunger kidong, Ungma Imlang ajanga tenüngsang tetushi tulu agütsür. Nenok wadang nung ano asen Teyanglur Tsüngrem-i maneni moajang ta asen Imsongunger kidong sarasadem.

Kidong tenüng nung

Sd/-
Wb. Imlikokba Imsong,
Tatar

Sd/-
Wb. Imtisosang Imsong,
Tatar

Nagaland tetsür team National Tug of War Championship atema apusoago



Nagaland team Guwahati-i mao tsüngda tir aser CBCT Pastor den tangokba noksa nung angur.

Dimapur, Luroi/August 21 (TYO): Nagaland Tug of War Association (NTWA) tawabangba kübok tetsür asayar ti aser ketdangsür ana 38buba National Tug of War Championship (Senior Women & Mixed 4+4) atema apusoago. Iba asayamung ya Shirdi, Maharashtra nung August 22 nungi 25 tashi asayatsü.

Team Manager, Kuzhovesa Soho-i sangdong ka ajanga ashiba agi, tetsür asayar ti rongnung Vikehenuo Zumvu (Captain), Vekhonielu Curhah, Haizuyile, Thejanienuo Thevo, Sezolu Luruo, Medongunuo Thevo, Neivi Metha aser Keneithonuo Sanchu nung densema lir. Team ya Team Manager, Kuzhovesa Soho aser Team Coach, Vemele Thingo nati anir asayatsü.

NTWA team 2023 küm September ita Tawang, Arunachal Pradesh nung National Tug of War Championship nung shilem agi aser mixed category nung silver medal angu aser 2025 kuma

February ita Palghar, Maharsatra nung Catch Weight category nung silver medal ngua liasü.

Nagaland tetsür Team tang mezügbuba iba asayamung nung asayatsü lir aser takok tajung ngur meyipa arutsü imlar. Iba dak sendakba nung NTWA-i asaya meimer ajak dang Nagaland team sarasadem nung bilemtettsü mepeshia metetdaksüogo.

Tug of War Federation of India (TWFI) tawabangba küm NTWA nungi tebur asayar ti World Outdoor Tug of War Championship nung asayatsü lir. Iba asayamung ya Nottingham, England nung September 4 nungi 7 tashi asayatsü.

NTWA tir, Dr. Er. Vekho Swuro Toulazouma'er kidang Nagaland tetsür team minoktsüba sentong tatsüka agiba mapang Swuro-i, takok tashi tajungtiba asayatsü imlaja ataba lemsatepba den team dang saisapong tanüla maneni ajungkettsü ajungshi. Paisa, NTWA nungi asayartemi medal

bener arutsü aser Tsüngrem sentsüwangshidaksütsü imla ataba lemsatep.

Swuro-isa, team sponsor asüba atema Nagaland Chief Minister, Dr. Neiphiu Rio dang kanga pelaba lemsatep. Paisa, Rio lenisüba nung Nagaland nungi lanurtem renloka odor aser temaba jenjang atongtsüsa jenjang agidar, ta ashi.

Maneni Swuro-i, logistic teyari ajak agütsüba atema 13th Assam Rifles, Kohima Commandant, Col. Tarun Rana dang kanga pelaba lemsatep. 2025 küm June ita nungi tanü tashi Rana-i NTWA asayartem parnok training atema ground agütsüdar aser iba den asayar aser Association nungdakba ajak peritsüdar. Pa ya Association nung shilem ka lir, ta Swuro-i ashi.

Sentong nung Chakhesang Baptist Church, Toulazouma, Ngutsolo Therie-i Tsüngrem o azüng aser Nagaland team atema temaotsü meshizüka sarasademja liasü.

Team ya August 27 nü Dimapur tonga arutsü imlar.

Mokokchung nung District Junior Athletics Meet 2025 akatsü

Mokokchung, Luroi/August 21 (TYO): Imkongmeren Sports Complex, Mokokchung nung August 30 nü nungi tenzüka Mokokchung Athletics Association (MAA) ajanga Nagaland Athletics Association (NAA) akhüm nung Mokokchung District Junior Athletics Meet 2025 tetsür aser tebur naprongla Under-14, Under-16, aser Under-18 pur atema akatsü ta MAA ajanga sangdong ka nung metetdaksüogo.

Iba asayamung nung shilem agirtem rongnungi tajungtem Mokokchung District tenüng nung taruba September ita 2nd Nagaland Junior Athletics Championship 2025 nung asayatsü asoshi shimtetsü.

Mokokchung District Junior Athletics Meet 2025 nung Under-14 category purtem 60m sprint, long jump, high jump (scissor), back throw (1kg shot put), and 600m run item nungi shimtetsü. Under-16 aser Under-18 nung

asayatsüpurtem individual track and field events, sprints ranging from 60m to 1000m, long jump, high jump (scissor technique), aser shot put ta alitsü.

Iba asayamung nung adentsüpurtem Aadhar nung aliba ama U-14 boys aser girls (tasoba 25/09/2011 nungi 24/09/2013), U-16 boys aser girls (25/09/2009 nungi 24/09/2011) aser U-18 boys aser girls (tasoba 25/09/2007 nungi- 24/09/2009) ta asütsü asoshi metetdaksüogo.

Mokokchung Athletics Association ajanga iba asayamung nung adentsü asoshi asaya jangrartem, school, institutions ajaki August 29, 2025 tashi nung tenüng agütsütsüla. Iba asayamung nung shimteter 2nd Nagaland Junior Athletics Championship 2025 nung asayartem nem travel allowance-bo agütsütsü aser nungtakbapurtemi +91 87984 37988, +91 98565 42605 nung tongteprateptsü akok ta kasa sangdong nungsa metetdaksüogo.

Salima lenisüba nung India tetsür team Asia Cup asayatsü

Luroi/August 21, 2025 (Agencies): Asia Cup atema India tetsür hockey team nung asayar 20 tenüng sangdongogo aser asayar tejen Salima Tete maneni captain asütsü shimogo. Iba asayamung ya Hangzhou, China nung September 5 nungi 14 tashi asayatsü.

Iba asayamung ya kanga tongtibang lir, kechiyong iba asayamung akokba team 2026 FIH Women's Hockey World Cup nung indang indanga asayatsü maongka angutsü.

Asayamung nung India team Pool B nung Japan, Thailand, aser Singapore den asayatsü. India team mezügbuba asaya Thailand den September 5 nü asayatsü aser iba sülen Japan den September 6 nü asayatsü. Pool-stage nung India team tatembangbuba asaya September 8 nü Singapore den asayatsü.

"Hangzhou nung women's Asia Cup atema squad shimba dak onok kanga temulung asür," ta Chief Coach Harendra Singh-i ashi.

Arishi küm 27 tain Salima ya taoba küm captain asütsü shimba sülen team nung tongtibang asayar ka kümogo.

"Team kanga meranga training agia arudar aser onoki asayar tejen aser tasentem

liromedema shimtsü merangdangogo," ta Singh-i ashi.

Team nung asayar tejen aser tasentem meyoktepa lir aser goalkeeper asütsü Bansari Solanki aser Bichu Devi Kharibam na shimogo.

Defence ya asayar tejen Nikki Pradhan aser Uditia nati anir asayatsü aser midfield nung Neha, Salima, Lalremsiami, Sharmila Devi, Sunelita Toppo, aser Vaishnavi Vitthal Phalke nung densema lir.

Forward nung Navneet Kaur, Sangita Kumari, Mumtaz Khan, Deepika, Beauty Dungdung, aser Rutaja Dadaso Pisal nung asayatsü.

Ajisüaka asayar tejen Savita aser Sushila Chanu nabo team nung züngoksema mali.

Asia Cup atema India tetsür team:

GOALKEEPERS: Bansari Solanki, Bichu Devi Kharibam

DEFENDERS: Manisha Chauhan, Uditia, Jyoti, Suman Devi Thoudam, Nikki Pradhan, Ishika Chaudhary

MIDFIELDERS: Neha, Vaishnavi Vitthal Phalke, Salima Tete, Sharmila Devi, Lalremsiami, Sunelita Toppo

FORWARDS: Navneet Kaur, Rutaja Dadaso Pisal, Beauty Dungdung, Mumtaz Khan, Deepika, Sangita Kumari.

Errani aser Vavassori nati US Open tarep temeyoktep asaya kokogo



Luroi/August 21, 2025 (Agencies): Defending champions Sara Errani aser Andrea Vavassori nati Brehostibarnü final nung Iga Swiatek aser Casper Ruud na koka US Open tarep temeyoktep asaya kokogo.

Italy nung tarep yagi final asaya nung Swiatek aser Ruud na ya 6-3, 5-7, 10-6 agi koka senpet USD million 1 agizükogo.

"Iba takok ya iba asayamung nung masayatetba tarep asayartem atema lir," ta Errani-i ashi.

"Tanü tarep asaya ya product tajung ka ta sayuogo ta amanger," ta Vavassori-i shisem.

Kasa mapang nung Swiatek-ia tena nem tenügsang agütsüogo. "Congratulations. Nenati tarep temeyoktep asayartem ya kija asayartem dang nungi tactically tesangraba ta kuli agütsüogo," ta Poland tsürla yagi ashi.

"Ajisüaka künatia tatem tashi meranga asayaogo. Künati takok tashi toktepba asayatsü merangogo," ta lai shisem.

Swiatek-i Grand Slam trok koker lir aser world rankings nung tanabuba jejang nung lir. La Hombarnü Jasmine Paolini nem Cincinnati Open final asayaba sülen iba asayamung nung Ruud den külemi asayatsü atema New York-i oa liasü.

Kasa mapang nung Cincinnati Open nung tebur kija asaya akoksang Carlos Alcaraza British tsür Emma Raducanu den asaya saka Mognolbarnü tsükatok aser Novak Djokovic-a Olga Danilovic den külemi asaya liasü.

Nüngtugu asayartem aika asayaba ajanga asayar reprangertem aika atsüa aruogo, saka Errani aser Vavassori nati tena küm ana tashi külemi asaya aruba partnership sayuogo. Tenati taküm French Open-a koker lir.

Mezügbuba set nung Errani aser Vavassori na 4-1agi tejakdang aküm. Swiatek aser Ruud nati serve ka break asü saka iba dak alaka tanga asayatem mekoktet.

Tanabuba set nung 4-5 agi tesülen aliba mapang Swiatek aser Ruud nati game asem atonga koka tiebreaker asayatsüsa aküm.

Tiebreaker nung Italy nung tarep ya 4-0 agi tejakdang aküm aser Swiatek o Ruud na nem memenepdaksüi asaya koka liasü.

BILEMDANGANG

"Tasüba ya tatembang masü, saka tatem maka alitsü atema tetenzüker lir."